

॥ मृत्युञ्जयहोम-मन्त्राः ॥

अपैतु मृत्युरमृतं न आगन्वैवस्वतो नो अभयं कृणोतु। पूर्णं वनस्पतैरिवाम्बिनः शीयतां रयिः सचतां नः शचीपतिः॥१॥

मृत्युर्नश्यत्वायुर्वर्धतां स्वाहा। मृत्यव इदं न मम॥

परं मृत्यो अनु परेहि पन्थां यस्ते स्व इतरो देवयानात्। चक्षुष्मते शृण्वते ते ब्रवीमि मा नः प्रजां रीरिषो मोत वीरान्॥२॥

मृत्युर्नश्यत्वायुर्वर्धतां स्वाहा। मृत्यव इदं न मम॥

वातं प्राणं मनसाऽन्वा रभामहे प्रजापतिं यो भुवनस्य गोपाः। स नो मृत्योस्त्रायतां पात्वहंसो ज्योग्जीवा जरामशीमहि॥३॥

मृत्युर्नश्यत्वायुर्वर्धतां स्वाहा। मृत्यव इदं न मम॥

अमुत्र भूयादध यद्यमस्य बृहस्पते अभिशस्तेरमुञ्चः। प्रत्यौहतामश्विना मृत्युमस्माद्देवानामग्रे भिषजा शचीभिः॥४॥

मृत्युर्नश्यत्वायुर्वर्धतां स्वाहा। बृहस्पतये अश्विभ्याम अग्नये च इदं न मम॥

हरिः हरन्तमनुयन्ति देवा विश्वस्येशानं वृषभं मतीनाम्। ब्रह्म सरूपमनुमेदमागादयनं मा विवधीर्विक्रमस्व॥५॥

मृत्युर्नश्यत्वायुर्वर्धतां स्वाहा। ब्रह्मण इदं न मम॥

शल्कैरग्निमिन्धान उभौ लोकौ संनेमहम्। उभयौलोकयोर्ऋध्वाऽति मृत्युं तराम्यहम्॥६॥

मृत्युर्नश्यत्वायुर्वर्धतां स्वाहा। मृत्यव इदं न मम॥

मा छिंदो मृत्यो मा वधीर्मा मे बलं विवृहो मा प्रमोषीः। प्रजां मा मे रीरिष आयुरुग्र नृचक्षसं त्वा हविषा विधेम॥७॥

मृत्युर्नश्यत्वायुर्वर्धतां स्वाहा। मृत्यव इदं न मम॥

मा नो महान्तमुत मा नो अर्भकं मा न उक्षन्तमुत मा न उक्षितम्। मा नो वधीः पितरं मोत मातरं प्रिया मा नस्तनुवो रुद्र रीरिषः॥८॥

मृत्युर्नश्यत्वायुर्वर्धतां स्वाहा। रुद्राय इदं न मम॥ [अप उपस्पृश्य।]

मा नस्तोके तनये मा न आयुषि मा नो गोषु मा नो अश्वेषु रीरिषः। वीरान्मा नो रुद्र भामितो वधीर्हविष्मन्तो नमसा विधेम ते॥९॥

मृत्युर्नश्यत्वायुर्वर्धताꣳ स्वाहा॥ रुद्राय इदं न मम॥ [अप उपस्पृश्या।]
 प्रजापते न त्वदेतान्यन्यो विश्वा जातानि परिता बभूव। यत्कांमास्ते जुहुमस्तन्नो अस्तु
 वयꣳ स्याम पतयो रयीणाम्॥१०॥

मृत्युर्नश्यत्वायुर्वर्धताꣳ स्वाहा॥ प्रजापतय इदं न मम॥
 यत इन्द्र भयामहे ततो नो अभयं कृधि। मघवन्क्षुग्धि तव तन्न ऊतये विद्विषो विमृधो
 जहि॥११॥

मृत्युर्नश्यत्वायुर्वर्धताꣳ स्वाहा॥ इन्द्राय मघवत इदं न मम॥
 स्वस्तिदा विशस्पतिर्वृत्रहा विमृधो वशी। वृषेन्द्रः पुर एतु नः स्वस्तिदा अभयङ्करः॥१२॥

मृत्युर्नश्यत्वायुर्वर्धताꣳ स्वाहा॥ इन्द्राय अभयङ्कराय इदं न मम॥
 त्र्यम्बकं यजामहे सुगन्धिं पुष्टिवर्धनम्। उर्वारुकमिव बन्धनान्मृत्योर्मुक्षीय माऽमृतोत्॥१३॥

मृत्युर्नश्यत्वायुर्वर्धताꣳ स्वाहा॥ त्र्यम्बकाय इदं न मम॥
 अपमृत्युमपक्षुधम्। अपेतः शपथं जहि। अधा नो अग्न आवह। रायस्पोषꣳ
 सहस्रिणम्॥१४॥

मृत्युर्नश्यत्वायुर्वर्धताꣳ स्वाहा॥ मृत्यव इदं न मम॥
 ये ते सहस्रमयुतं पाशाः। मृत्यो मर्त्याय हन्तवे। तान् यज्ञस्य मायया।
 सर्वानवयजामहे॥१५॥

मृत्युर्नश्यत्वायुर्वर्धताꣳ स्वाहा॥ मृत्यव इदं न मम॥
 जातवेदसे सुनवाम सोमं मरातीयतो निदहाति वेदः। स नः परषदति दुर्गाणि विश्वा
 नावेव सिन्धुं दुरिताऽत्यग्निः॥१६॥

मृत्युर्नश्यत्वायुर्वर्धताꣳ स्वाहा॥ अग्नये जातवेदस इदं न मम॥
 भूर्भुवः स्वः। ओजो बलम्। ब्रह्म क्षत्रम्। यशो महत्। सत्यं तपो नाम। रूपममृतम्।
 चक्षुः श्रोत्रम्। मन आयुः। विश्वं यशो महः। समं तपो हरो भाः। जातवेदा यदि वा
 पावकोऽसि। वैश्वानरो यदि वा वैद्युतोऽसि। शं प्रजाभ्यो यजमानाय लोकम्। ऊर्जं पुष्टिं
 ददद्भ्याववृथ्स्व॥१७॥

मृत्युर्नश्यत्वायुर्वर्धताꣳ स्वाहा॥ जातवेदसे वैश्वानराय इदं न मम॥

मृत्युर्नश्यत्वायुर्वर्धतां भूः॥१८॥

मृत्युर्नश्यत्वायुर्वर्धतां॑ स्वाहा॥ अग्नय इदं न मम॥

मृत्युर्नश्यत्वायुर्वर्धतां॑ भुवः॥१९॥

मृत्युर्नश्यत्वायुर्वर्धतां॑ स्वाहा॥ वायव इदं न मम॥

मृत्युर्नश्यत्वायुर्वर्धतां॑ सुवः॥२०॥

मृत्युर्नश्यत्वायुर्वर्धतां॑ स्वाहा॥ सूर्याय इदं न मम॥

मृत्युर्नश्यत्वायुर्वर्धतां॑ भूर्भुवः सुवः॥२१॥

मृत्युर्नश्यत्वायुर्वर्धतां॑ स्वाहा॥ प्रजापतय इदं न मम॥

॥ॐ शान्तिः शान्तिः शान्तिः॥



(तैत्तिरीयारण्यकम् - ४/प्रपाठकः - ३/अनुवाकः - १५)

हरि॑रु॒ हर॑न्त॒मनु॑यन्ति दे॒वाः। विश्व॑स्येशानं वृष॒भं म॑तीनाम्। ब्रह्म॒ सरू॑प॒मनु॑मे॒दमागा॑त्।
अय॑नं॒ मा वि॒व॒धीर्वि॒क्रम॑स्व। मा छि॑दो मृत्यो॒ मा व॑धीः। मा मे॒ बलं॑ विवृ॒हो मा॑ प्रमो॒षीः।
प्र॒जां मा मे॑ रीरिष॒ आयु॑रुग्र। नृचक्ष॑सं त्वा ह॒विषा॑ विधेम। स॒द्यश्च॑क॒मानाय॑। प्र॒वे॒पा॒नाय॑
मृत्य॑वे॥१॥

प्रास्मा॒ आशा॑ अशृण्वन्। कामे॑नाजनयन्मुनः॑। कामे॑न मे॒ काम॑ आगा॑त्। हृद॑याद्धृद॑यं मृत्योः।
यद॑मीषा॒मदः॑ प्रि॒यम्। तदै॒तूप॑माम॒भि। पर॑ मृत्यो॒ अनु॑ परे॒हि पन्था॑म्। यस्ते॒ स्व इ॒तरो॑
दे॒व्याना॑त्। चक्षु॑ष्मते शृण्व॒ते ते॑ ब्रवीमि। मा नः॑ प्र॒जा॒ री॒रिषो॑ मोत वी॒रान्। प्र पू॒र्व्यं
मने॑सा॒ वन्द॑मानः। नाध॑मानो वृष॒भं च॑र॒षणी॑नाम्। यः प्र॒जाना॑मे॒क॒राण्मा॑नु॒षीणा॑म्। मृत्युं॑
य॒जे प्र॑थम॒जामृ॑तस्य॥२॥